

TEZAUUR LITURGIC

29 MAI / 11 IUNIE

SLUJBA

**SF. IERARH-
MĂRTURISITOR**


LUCA

VOINO-IASENETKI,

**ARHIEPISCOPUL
SIMFEROPOLULUI**



**MINEIUL PE MAI
MOSCOVA**



МЕСЯЦА МАЯ В 29-й ДЕНЬ

Святителя Луки, исповедника, архиепископа Симферопольскаго и Крымскаго

НА ВЕЛИЦЕЙ ВЕЧЕРНИ

На Господи, возвах: стихиры на 8, лас 4:

Святителю Христов Луко, / жертва Богу
священная, / исповедников честное украшение, /
Церкве Православныя удобрение, / Крымския
земли похвало, / врачу благий и милостивый, /
моли от болезней и бед избавитися / верою и
любовию творящим всечестную память твою.

Исповедник священен / и архипастырь
благоприятен, / благочестия образ / и источник
исцелений, / святителю Луко, явился еси, / ты бо,
посреде гонений служение Церкви и подвиг
врачевания не оставив, / добре людем послужил
еси. / Темже, священное совершающе
торжество, / песнями духовными тя ублажаем.

Егда услышал еси божественный глас,
блаженне Луко, / тогда, крест твой возем, / Христу
невозвратно последовал еси / и, любовию к Нему

распала́емь, / посреде́ скорбе́й, боле́зней и бед /
испове́дание до́бре сохрани́л еси́. / Те́мже,
свяще́нное соверша́юще торже́ство, / пе́снями
духо́вными тя ублажа́ем.

И́ны стихи́ры, глас 8:

Па́мь твою́, свя́тителю Луко́, / с похва́лами
соверша́юще, / ра́дости духо́вныя исполня́ются
ча́да Це́ркве Правосла́вныя / и прие́млют, я́ко от
исто́чника неоску́днаго, / боле́знем и недуго́м
благода́тное исцеле́ние, / его́же и нам подава́й,
врачу́ богоблаже́нне, / моли́твами твои́ми.

Богому́дре свя́тителю, / я́ко живописа́тель
изря́ден и врачевате́ль иску́сен, / апо́столу Луке́
уподо́бился еси́, / наипа́че же, душе́ю
ми́лостивою / и се́рдцем люботру́дным тому́
после́дуя, / во мра́це безбо́жия ве́ру непоро́чную
утвержда́л еси́. / Сего́ ра́ди мо́лим тя: / исцели́ и
просвети́ ду́ши на́ша моли́твами твои́ми.

Свя́тителю Луко́ богоблаже́нне, / в темни́цах и
изгна́ниях / на всяк день боле́знем и напа́stem
приобща́ясь, / страда́ния Христа́ ра́ди возлюбил
еси́ / и, преле́сти зи́му тепло́ю божество́вныя
благода́ти растопи́в, / ко Христу́, Незаходи́мому
Сия́нию, / со сла́вою всели́лся еси́. / Сего́ ра́ди

мо́лим тя:/ исцели́ и просвети́ ду́ши на́ша
моли́твами твои́ми.

Сла́ва, глас то́йже:

Святи́телю о́тче Луко́ пречу́дне,/ служи́телю
Та́ин Боже́ственных,/ де́лателью виногра́да
Христо́ва,/ ве́ры утвержде́ние,/ Це́ркве
Правосла́вныя сто́лпе непоколеби́мый,/
исто́чнице исцелений оби́льный,/ Кры́мстей
па́стве те́плый предста́телю,/ моли́ся Пресвяте́й
Тро́ице/ спасти́ся ду́шам на́шим.

И ны́не, Богоро́дичен: Царь Небе́сный:

Вход. Прокі́мен дне. И чтéния святі́тельская.

На литіи стихи́ры, глас 6:

Днесь благода́тию Боже́ственного Ду́ха
со́брани,/ лик соста́вим и песнь хвале́бную
воспо́им,/ па́мять творя́ще святі́теля и
испове́дника Луки́/ и, дивна́го во святы́х Свои́х
Бо́га благодаря́ще,/ торже́ства ви́новнику
моле́бне рцем:/ я́ко имы́й дерзнове́ние у Царя́
Сла́вы,/ врачевате́лю премудре,/ моли́ всяких
бед изба́виться/ любо́вию чту́щим тя.

Просвети́вся мно́гими добродéтелями,/ ве́ры
пра́выя свети́льник яви́лся еси́,/ святи́телю

преблаже́нне Луко́,/ и, тьму нече́стия разгна́в,/ ве́рным путь спасе́ния уясни́л еси́./ Те́мже и в Черто́г Небе́сный всели́лся еси́,/ иде́же мо́лиши Христа́ Бо́га о душа́х на́ших.

Ины́ стихи́ры, глас 1.

Подобен: Небе́сных чино́в:

Святите́лю Луко́, испове́днице Христовъ́,/ ты еси́ земли́ Кры́мстей похва́ла/ и гра́ду Симферо́полю в ве́ре утвержде́ние,/ щит и побе́да на сопроти́вныя,/ безме́здный целите́ль стра́ждущих,/ всем нам помо́щник и засту́пник,/ и моли́твенник о душа́х на́ших.

Божество́нными просвеще́ньми облиста́емь,/ мно́жеством добродете́лей, о́тче Луко́, обогати́лся еси́./ Те́мже богогласны́ми словесы́ твои́ми,/ я́ко водо́ю животво́рною Ду́ха,/ напая́еши сердца́ ве́рных, чту́щих тя,/ Бо́жие милосе́рдие сим возвеща́я.

Днесь ра́дуется Не́бо и земля́,/ и Це́рковь Ру́сская торже́ствуе́т/ в честны́й день прославлéния/ вели́каго уго́дника Бо́жия, святите́ля Луки́,/ целите́ля прехва́льнаго и врача́ до́браго,/ и моли́твенника те́плаго о душа́х на́ших.

Сла́ва, глас 8:

Святы́телю о́тче Луко́,/ просла́ви тя Госпо́дь
жити́я ра́ди многотру́днаго/ да́ром врачевáния
неду́гов,/ сего́ ра́ди пра́зднующих свѣ́то па́мь
твою́/ и лю́бовию припа́дающих к тебе́/
соблюди́ от вся́ких болѣ́зней душе́вных и
телѣ́сных/ и пода́й от Христа́ Бо́га на́шего/ мир
и ве́лию ми́лость.

И ны́не, Богоро́дичен: Безневѣ́стная Де́во:

На стихо́вне стихи́ры, глас 2.

Подобен: Егда́ от Дре́ва:

Егда́ беззако́ннии лю́дие,/ зло́бою неве́рия
ослепленни́и,/ гонѣ́ния лю́тая на Це́рковь
Ру́сскую воздвиго́ша/ и мно́гия па́стыри в
темни́цы всади́ша,/ тогда́, свя́те Луко́
пресла́вне,/ лю́бовию ко Христу́ распала́емь,/ во
земли́ Самарка́ндстей не́боя́зненно
святите́льства сан прия́л еси́/ и, па́ству ти от
Бо́га вруче́нную,/ до́бре упáсл еси́.

Стих: Свяще́нницы Твои́ облеку́тся в пра́вду/
и преподо́бнии Твои́ возра́дуются.

Егда́ безбо́жнии мучи́телие,/ беззако́нное
велѣ́ние исполня́юще,/ ру́ки сво́я на тя
возложи́ша/ и, я́ко злоде́я, изгна́нию преда́ша,/

тогда, святе исповедниче Христов, / верою в Сына Божия укрепляемь, / грады и веси земли Сибирския обходил еси / и люди ея, апостольскими труды просвещая, / от недугов душевных и телесных врачевал еси.

Стих: Блажен муж, бояйся Господа, / в заповедех Его восхощет зело.

Егда нечестивии убийцы, / лютою злобою дышущи, / неправедно тя оболгаша / и темничному заключению предаша, / тогда, священоисповедниче Луко преславне, / страдания тяжкая претерпевая, / мучителей безбожных не убоялся еси / и, все упование на Бога возлагая, / образ мужества верным людем явил еси.

Слава, глас 6:

Приидите, вси людие, / прославим дивнаго святителя, / в божественней славе пребывающа / и молитвами своими милость нам низпосылающа, / на земли же мощми своими исцеления щедро источающа; / и велегласно Господа Бога нашего возблагодарим, / яко дарова нам благодатнаго врачевателя / и священоисповедника достохвальнаго.

И ны́не, Богоро́дичен: Богоро́дице, Ты еси́
лоза́ и́стинная:

Тропа́рь, глас 1:

Возвести́телю пу́ти спаси́тельного,/ /
испове́днице непоколеби́мый,/ / и́стинный
храни́телю оте́ческих преда́ний,/ / Правосла́вия
наста́вниче,/ / Кры́мския землі́ архипа́стырю,/ /
врачу́ богому́дрый, святи́телю Луко́,/ / Христа́
Спа́са непреста́нно моли́,/ / дарова́ти душа́м
на́шим ве́лию ми́лость.

НА УТРЕНИ

На Бог Госпо́дь: тропа́рь святи́теля два́жды.
Сла́ва, и ны́не, Богоро́дичен, глас 1: Гаврии́лу
веща́вшу Тебе́, Де́во:

По 1-м стихосло́вии седа́лен, глас 3:

Но́вый свети́льник Це́ркве Ру́сская/ / и
моли́твенник те́плый за мир яви́лся еси́,
святи́телю Луко́./ / Те́мже и мы, припада́юще к
тебе́, взыва́ем:/ / изба́ви нас от вся́кия бе́ды и
напа́сти/ / и ко спасе́нию наста́ви моли́твами
ТВОИ́МИ.

Сла́ва, и ны́не, Богоро́дичен:

Богора́дованная Влады́чице, / святите́лем
похва́ло, пра́ведным утвержде́ние и всем
ве́рным утеше́ние! / Спаси́ ны от наси́льства
диаво́ля и лю́тых прегреше́ний /
предста́тельством и моли́твами Твои́ми.

По 2-м стихосло́вии седа́лен, глас 6:

Я́ко ма́слина плодови́та и лампа́да, е́лея
благово́ннаго испо́лнена, / пред Бо́гом яви́лся
еси́, святите́лю о́тче Луко́. / Сего́ ра́ди мо́лим тя: /
благоуха́нием святы́ни твоея́ отжени́ от нас
сма́рад грехо́вный / и е́леем моли́тв твои́х исцели́
стру́пы душ и теле́с на́ших.

Сла́ва, и ны́не, Богоро́дичен, глас то́йже:

Не прэ́зри моле́ния Твои́х рабо́в, мо́лимся,
Влады́чице Всепе́тая, / я́ко да изба́вимся вся́каго
обстоя́ния.

Псалом избра́нный: Услы́шите сия́, вси
язы́цы:

По полиеле́и седа́лен, глас 4:

Всечестна́я и светно́сная па́мь тво́я,
святите́лю Луко́, / испо́лни всех ра́дости и
весе́лия духо́внаго. / Те́мже и мы, восхваля́юще

во свѣтѣльствѣ труды́ твоя́/ и терпѣние в исповѣдничествѣ,/ сла́вим просла́вляшаго тя Го́спода./ Егѡ́же моли́ спастѣ́ся нам, любѡ́вию тя почита́ющим.

Сла́ва, и ны́не, Богоро́дичен:

Спаси́ всех, к Тебе́ притека́ющих,/ моли́твами Твои́ми, Де́во Богоро́дице,/ и изба́ви вся́кия ну́жды и ско́рби.

Степе́нна, 1 антифо́н 4-го гласа. Прокі́мен, глас 1: Уста́ моя́ возглаго́лют премудро́сть/ и поучѣ́ние се́рдца моего́ ра́зум. Стих: Услы́шите сия́, вси язы́цы,/ внуші́те, вси живу́щии по вселѣ́нней. Евангелие от Иоанна, зачало 35, от полу.

По 50-м псалме́ стихира, глас 6:

Па́стыря́ добра́,/ исповѣ́дника твѣ́рда,/ служи́теля Та́ин Христо́вых ве́рна/ и целі́теля неду́гов безме́дна/ ве́мы тя, свѣтѣ́телю Луко́./ Сего́ ра́ди мо́лим тя:/ изба́ви ны от наве́тов вра́жиих,/ болѣ́зней душе́вных/ и неду́гов телѣ́сных.

Канон Пресвятей Богородице со ирмосом на 6 и святителю на 8. Глас 8.

Песнь 1

Ирмос: Дивному Богу величия принесем / и
великолепно с нами, / да воспоет земля и небо /
ясно славу Его.

Во дни гонений тяжких на Церковь Русскую /
священный сан во граде Ташкенте небоязненно
приял еси, блаженне Луко, / и отступники,
нововведения лстивая вводящая, мужественно
обличал еси, / принося величие Богу и воспевая
славу Его.

Явился еси пастве твоей, исповедниче
Христов, / столп непоколебимый и защитник
крепкий, / болящим исцеление, скорбящим
утешение, / Бога величая и воспевая славу Его.

Вседержителя и Господа о нас моли,
святителю Луко, / даровати нам оставление
прегрешений, / да с тобою дивнаго Бога
возвеличим и воспоём славу Его.

Богородичен: Ты призывающим,
Богородительнице Пречистая, / явилася еси
спасительное пристанище и покров. / Темже
любовию зовем Ти: / Владычице, спаси ны / и

научи́ дивному́ Бо́гу вели́чия приноси́ти и
воспева́ти сла́ву Его́.

Песнь 3

Ирмо́с: Уподо́би мя, Христе́, умно́ горé
Сио́нстей,/ возвы́сивый и утверди́вый в
наде́жди о Тебе́/ и иска́павый ро́су благода́ти,/
Человеколю́бче.

Егда́ в Сиби́рскую зе́млю изгна́н был еси́,
святите́лю,/ тогда́ мно́гия гра́ды ея́
апосто́льскими труды́ просвети́л еси́/ и,
телесны́я недуги́ врачу́я,/ о лю́дех Бо́гу моли́лся
еси́,/ да источи́т на них ро́су благода́ти Своея́,
яко́ Человеколю́бец.

Руко́ю твоёю́ святите́льскою́ очи́ слепы́м
исцели́л еси́, врачу́ предивны́й,/ та́же и ду́ши их
Свётом Христо́вым просвети́л еси́, моля́ся,/ да
источи́т на них Госпо́дь ро́су благода́ти Своея́,
яко́ Человеколю́бец.

Твои́ми поуче́нии, святите́лю Луко́,/ я́ко
до́брый па́стырь, указа́л еси́ лю́дем путь в
Ца́рство Небе́сное./ Сего́ ра́ди сла́вою от Бо́га
увенча́лся еси́,/ Его́же моли́, да низпо́слет и нам
ро́су благода́ти Своея́, я́ко́ Человеколю́бец.

Богорóдичен: Люби́ти у́бо Тя, Пречи́стая Богома́ти, и пёсньми прославля́ти/ науча́ет нас вели́кий Арха́нгел,/ се́го ра́ди вопие́м Ти, Богоневёсто:/ ра́дуйся, Благода́тная, Госпо́дь с Тобо́ю;/ ра́дуйся, Ра́досте А́нгелов и всех челове́ков.

Седа́лен, глас 8:

О́чи серде́чней ко Го́споду вы́ну имёя,/ испове́дник дерзнове́нный ве́ры Христо́вы яви́лся еси́, о́тче Луко́,/ и, си́лою словес божёственных полки́ безбо́жных отгоня́я,/ Кры́мскую па́ству му́дре упасл еси́./ Те́мже по кончи́не в Небе́сныя оби́тели со сла́вою водвори́лся еси́, святителю́ блаже́нне./ Моли́ Христа́ Бо́га грехо́в оставле́ние дарова́ти/ чту́щим всечестну́ю па́мь твою́.

Сла́ва, и ны́не, Богорóдичен:

Тя Приста́нище и Стёну,/ Прибе́жище и Наде́жду,/ Покро́в и Заступле́ние тёплое има́мы,/ к Тебе́ притека́ем и вопие́м приле́жно:/ спаси́, Богорóдице, упова́ющия на Тя/ и от прегрешёний изба́ви.

Песнь 4

Ирмос: Всел еси на кони, апостоли Твоя,
Господи, / и приял еси рукама Твоима узды их, /
и спасение бысть еждение Твое / верно
поющим: / слава силе Твоей, Господи.

Юже стяжал еси честною Твоею Кровию, /
Церковь Твою, Христе, утверди и направи на
путь мира, / тако воздыхал еси, святителю отче
Луко, / преподобней твои руке горе воздевая.

Любовь Христову в деннонощных трудех
твоих явил еси, святителю: / недужных
безмездно врачуя, / вдов и сирых милостивно
питаая, / согрешающих кратко вразумляя, /
унывающих и отчаяваемых отечески утешая, / о
нихже и Жертву безкровную благоговейно Богу
принося.

Ни глад, ни мраз, ни темничная заключения, /
ни безчестия, ни муки, ни самая смерть /
возмогша разлучити тя, святителю, от любви
Христовы, / ты бо, во изгнании сый и пределы
земли Русския обходя, / людем ея образ пастыря
добраго явил еси / и, яко столп непоколебимый
пребывая, / исповедник верен нареклся еси.

Богорóдичен: Крéпость нáша Ты еси́,
Пречистая Богомáти,/ Твоими́ бо мольбáми
избáвихомся вси от страстéй и бед,/ обстоя́ний
и недúгов многообра́зных, Спа́су Христу́
зову́ще:/ сла́ва си́ле Твоéй, Го́споди.

Песнь 5

Ирмо́с: Повелéния Твоя́ просвещéнием,
Христé Бо́же,/ я́ко Благ, показáл еси́,/ занé,
Светода́вче,/ от но́щи у́тренююще, сла́ву
возсыла́ем.

Еди́ницу в Тро́ице, Триипоста́сное Божество́,/
богослóвил еси́, Луко́ блаженне,/ и триеди́ный
соста́в челове́ческаго естества́/ писáнии твоими́
изъя́снил еси́.

Егда́ испытáние рáтное при́де на зéмлю
нáшу,/ тогда́ ты, святителю́, во врачéбнице
гáда Красноя́рска, врачéбное иску́ство
прилага́я,/ мно́гия во́ины от неисцéльных ран
исцели́л еси́ и к жи́зни возврати́л еси́.

Словеса́ похва́льная приими́ ны́не от нас,
недостóйных чад твои́х, святителю́ Луко́,/ и
моли́ Христа́ Бо́га,/ да избáвит нас шу́ияго
стоя́ния/ и сподóбит Небéснаго Цáрствия
Своего́.

Богородичен: Едина Чистая,
Богородительнице,/ не презри молений раб
Твоих,/ но угодника Твоего ради/ принеси сия
ко престолу Сына Твоего,/ да спасет души
наша.

Песнь 6

Ирмос: Отвергл мя еси/ во глубины сердца
морского,/ и видех чудеса Твоя, Господи.

Раздавая последняя твоя и попечение о
неимущих имея,/ сироты и вдовыя с любовью
питал еси,/ Милостивому Спасу подражая.

Духом веры пламенея,/ истинное благочестие
верным являл еси, святителю Луко,/ и, иереи
добре назирая,/ к деланию пастьерскому тех
наставлял еси.

Не отрекся еси креста Господня/ во
многотрудном житии твоём, архиерею Божий,/ и
ныне архипастырем нашим молитвами твоими
помози,/ да право правят слово Божественныя
Истины.

Богородичен: Отроковице Богоизбранная,
Дева Марие,/ восхваляем Тя вси и верно
взываем:/ моление наше прими и прошения
скоро исполни.

Конда́к, глас 1:

Я́ко звезда́ всесвѣ́тлая, / в но́щи безбо́жия
добродѣ́тельми проси́ял еси́ / и, от гони́телей
мно́го пострада́в, / непоколебим вѣ́рою пребы́л
еси́, / врачѣ́бною же му́дростию укра́шен, /
мно́гия лю́ди исцели́л еси́. / Сего́ ра́ди с любóвию
вопи́ем ти: / ра́дуйся, добропобѣ́дный
исповѣ́днице, / ра́дуйся, о́тче святи́телю Луко́, /
ра́дуйся, земли́ Ру́сския похва́ло и утвержде́ние.

И́кос:

Исповѣ́данием твёрды́м Бо́га просла́вив, /
се́ятель духо́вных добродѣ́телей яви́лся еси́, Луко́
прехва́льне, / и, я́ко архипа́стырь и учи́тель
благоче́стия, / нечестия́ ре́вностный
искорени́тель показáлся еси́, / жи́знь же в
пóдвизех и трудѣ́х мно́гих соверши́в, / венѣ́ц
неувяда́емый от Го́спода при́ял еси́. / Сего́ ра́ди с
любóвию вопи́ем ти: / ра́дуйся, добропобѣ́дный
исповѣ́днице, / ра́дуйся, о́тче святи́телю Луко́, /
ра́дуйся, земли́ Ру́сския похва́ло и утвержде́ние.

Песнь 7

Ирмо́с: В нача́ле зе́млю основа́вый / и Небеса́
сло́вом утверди́вый, / благослове́н еси́ во ве́ки,
Го́споди, Бо́же отец на́ших.

Ева́нгельски Христу́ послéдовав, о́тче Луко́,/ елéем любв́е врачевáл еси́ люди́ стра́ждущия и боля́щия/ и, сло́во Бо́жие возвещáя, святит́ельски потрудíлся еси́,/ да прославя́ют вёрная ча́да Сотвор́шаго вся Гóспода, воспева́юще:/ благословéн еси́ во вéки, Бо́же отéц нáших.

Па́стырь добрый словéсному ста́ду твоёму́ был еси́, святит́елю Луко́,/ ду́шу твою́ за него́ прíсно положити готóвый./ Тёмже яв́ился еси́ обидимым застúпник непреоборíмый,/ правды Бо́жия ревнит́ель неустрашимый,/ сильных мíра сего́ крóткий обличítель, Гóсподу воспева́я:/ благословéн еси́ во вéки, Бо́же отéц нáших.

Ра́довахуся люди́е гра́да Симферóполя,/ зря́ще тя, о́тче Луко́, свéтлостию са́на святит́ельскаго облечéна/ и престóлу благодáти Бо́жия в моли́тве предстоя́ща./ Ты же, по апóстолу, вся всем быв,/ мно́гия ко Христу́ привéл еси́,/ иже ны́не Гóспода прославя́ют:/ благословéн еси́ во вéки, Бо́же отéц нáших.

Богорóдичен: Рáдости Подáтельнице, Богородítельнице Пречíстая,/ вéрою сла́влящия и от души́ пою́щия Тя рáдости неизречéнныя

исполни/ и Света Невечерняго сподоби, Дево
Богоблагодатная.

Песнь 8

Ирмос: Покрыва́яй вода́ми превы́спрення́я
Сво́я,/ полага́яй мо́рю предѣл песо́к/ и содержи́
вся,/ Тя поёт со́лнце, Тя сла́вит луна́,/ Тебе́
прино́сит песнь́ вся тварь́,/ я́ко Соде́телю́ всех
во ве́ки.

И́мя твоё́, святи́телю́ Луко́,/ я́коже
благоуха́ние ра́я Бо́жия по всей́ земли́
прославля́ется,/ услажда́я сердца́ ве́рующих/ и
призыва́я благода́рне воспевати́ Соде́теля́ всех
во ве́ки.

Ны́не Престо́лу Бо́жию предстоя́,/ мо́лиши́ся
о лю́дех, тя призыва́ющих,/ на моли́тву же твою́
с ве́рою упова́ющих/ и благода́рящих Соде́теля́
всех во ве́ки.

О, иера́рше богому́дре,/ ты, течѣ́ние жи́зни
до́бре соверши́в,/ ве́ру Христо́ву в гонѣ́ниях и
страда́ниях до́бре сохрани́л еси́,/ сего́ ра́ди ны́не
вене́ц небе́сный от Подате́ля жи́зни обре́л еси́,/
ра́дуясь и воспевая́ освяща́ющаго Соде́теля́ всех
во ве́ки.

Богорóдичен: Шед путём заповедей Сына
Твоего, Богомати, / весь род человеческий Твоим
Рождеством от прáотеческаго падения воста / и
клятвы прамáтерния изба́вися, / воспева́я
Содéтеля всех во ве́ки.

Песнь 9

Ирмо́с: Благословéн Господь, Бог Израилев, /
воздвигнувший рог спасения нам / в дому́
Давидове, óтрока Своего, / в нѣхже посети́ нас
Восто́к с высоты / и напра́вил ны есть на путь
ми́ра.

Ева́нгелие Христо́во пропове́дав, богому́дре
святителю, / служéние Бо́жие на землі́
страда́льчески соверши́л еси́ / и, прия́тия
Святы́х Та́ин Христо́вых сподо́блѣся, / о Бо́зе
ми́рно почи́л еси́.

Ны́не с Вы́шними во́инствы моли́, уго́днице
Христо́в, Человеколю́бца Бо́га, / дарова́ти
притека́ющим к тебе́ / оставле́ние грехо́в и
жити́я исправле́ние.

И по сме́рти, я́ко жив сый, / благода́тию
Бо́жиею с на́ми пребыва́еши, святителю Луко́,
испове́днице до́брый, / укрепля́я нас твёрдо

стояти в Православней вере / и в добродетельней
жизни наставляя.

Богородичен: Еже радуйся, со архангелом
зовем Ти, Чистая, / яко Царя Небеснаго родила
еси, Дево Богородице, и молим Тя: / избави ны,
рабы Твоя, от вечныя смерти.

Светилен:

Светильник веры и исповедник твердый
явился еси, Луко преславне. / Плотию, аще и
почил еси, / но духом в Царствии невечернем со
Христом пребываеши / и присно молишися Ему
о всех, / верою и любовию тя почитающих.

Слава, и ныне, Богородичен:

Вышних чиноначалий Превышшая сущи, /
нас, нижних, не остави, Пречистая
Владычице, / но присно с нами буди / и от
всяких наветов вражиих свободи.

На хвалитех стихиры, глас 4:

Красуйся и ликуй, граде Симферополю, /
торжествуйте, вси православнии, / зряще
честныя мощи врачевателя безмезднаго, /
источающия исцеления чудная / всем,
притекающим к ним с верою / и воспевающим

Христа́ Жизнода́вца, / подаю́щего нам мир и
вѣлию́ ми́лость.

Во хра́ме Святы́я Трои́цы, / иде́же лежа́т ны́не
мо́щи твоя́, / преблаже́нне Луко́ святите́лю, /
исцелѣ́ния подаю́тся всем челове́ком, / вѣрою
притека́ющим к ра́це твое́й. / Те́мже и мы
успе́рдно мо́лим тя: / моли́ Триипоста́снаго Бо́га /
дарова́ти нам мир и вѣлию́ ми́лость.

Весели́ся и торже́ствуй землѣ́ Ру́сская, /
иму́щи пред Бо́гом моли́твенника те́пла, / и́же,
яко́ и́стинный па́стырь Христо́в, / по́двиг
страда́ния и испове́дничества в преде́лах твои́х
соверши́. / Ны́не же в Небе́сней сла́ве Христу́
предстои́т / и, взира́я на неизрече́нную Его́
добро́ту, / прося́щим подае́т телѣ́сное здра́вие / и
мо́лит дарова́ти душа́м на́шим / мир и вѣлию́
ми́лость.

Сла́ва, глас 8:

Святите́лю о́тче Луко́, / ты, ева́нгельски
Христа́ возлюбив, / Его́́ Божѣ́ственное и́го и
крест испове́дничества на ра́мена подъя́л еси́ /
и, яко́ ле́гкое бре́мя, понѣ́сл еси́, /
архипа́стырский же по́двиг до́бре соверши́в, /
Ца́рствия Небе́снаго дости́гл еси́. / Те́мже

Господа славы моли, / даровати нам мир и велию милость.

И ныне, Богородичен, глас тойже:

Владычице, прими молитвы раб Твоих / и избави нас / от всякия нужды и печали.

Славословие великое. И отпуст.

НА ЛИТУРГИИ

Блаженны от канона, песни 3-я и 6-я.

Прокимен, глас 1: Уста моя возглаголют премудрость / и поучение сердца моего разум.

Стих: Услышите сия, вси языцы, внушите вси, живущии по вселенней.

Апостол ко Евреем, зачало 318.

Евангелие от Матфея, зачало 11.

Причастен: В память вечную будет праведник, от слуха зла не убоится.

**Утверждена Священным Синодом
Русской Православной Церкви
05.05.2015 (журнал № 28).**